

Lutino weng romo pwonye.

Dul lwod me pwonye wa me aboro ma mako goro i kit ma lutino kwo kwede ki gang wa ki i gang kwan.

Glades: Itye ka winyo dul lwod-wa me *Lutino weng romo pwonye*. Lwod man Jo ma kelo bot-wu aye Backup Uganda kacel ki Brainstud. Itwero winyo pwonye wa ni ki i wɪ yamu me internet ma tye iwang website wa ma ki lwongo ni www.backupuganda.org, ka itye ka winyo wa ki Gulu, iromo gamo pwonye man macalo dwon ma ki mako ki iMega FM, radio rupiny onyo iDivine Video & music library matye idye taun kany. Luahedi ma aa ki gang kwan me district weny romo gamo pwonye ni ki office pa DEO onyo District Education Officer ki bene luahedi ma aa ki gang kwan me city council romo gamo megi ki office pa CEO onyo City Education Officer ki bene igangi kwan magi, Highland primary school ma tye iObiya iyo Kitgum, Gulu prison primary school iyo Lacor ma opime ki ot lega Holy Cross, Gulu town primary school ma tye iyo Gulu University, Mary immaculate primary school inge gang lega madit pa Katoli ma ki lwongo ni Cathedral ma tye iFor-God, St Joseph's primary school onyo Christ the king demonstration primary school inge gang kwan Sacred Heart.

Kace imaro ngec ma ipwonye wa ni? bed agonya me nywakone ki lupaco nii, luremi, ki jirani ni bene. Ka dano madwong guwinyo pwonye ikom kit peki ma lutino nongo ikwan, ci waromo konyo lutino wa maber loyo!

Glades (Ann): Wajolo –wu ka winyo dul lwod-wa me aboro me Lutino weng romo pwonye. An nyinga Glades, atye latic me Backup Uganda. Tin wakubu dwan Dr Njuki Eria Paul wan ki lawota Too-lit i nywako lok ma mako gang kwan ma mege ma ki lwongo ni Center for lifelong learning.

Dong, in i bedo anga?

Too-lit (Dr. Njuki): An nyinga Eria Paul Njuki. An aye a won gang kwan ma ki lwongo ni Center for Lifelong Learning.

Glades (Ann): Ageno ni jo ma tye ka winyo-wa ma kong bene guwinyo dul lwod me pwony wa ma okato wigi romo po i kom gang kwan man kama wawinyo pire bene ki bot Peace ma kwano kany. En otito matut lok ma mako kom gang kwan man. Ento angeyo bene ni in pud i tye ki lok mogo mapol me awaca en i kom gang kwan man ento kong i titi wa matut i kom anga ma in i bedo, i aa ki kwene ki lok mogo ma myero wange.

Too-lit (Dr. Njuki): An abedo lapwony madit ki lapwony ma pwonyo lutino ma tye ki goro ma mako ryeko me wic nia i mwaka 1987.

Glades (Ann): Ber twatwal.

Too-lit (Dr. Njuki): Me medo i kom meno, mapat ki bedo lapwony i ot kwan keken, apwonye bene me bedo lapwony ma pwonyo lupwonye. Meno omiyo anongo tic macalo lapwony i

Kymbaboga University i kine me mwaka 80 nio ma Kyambogo oyubu ka kwan pa lutino matye ki goro mapatpat ma bene laca odoko ka pwonye madit pi kwan me konyo jo matye ki goro mapatpat madong bene ki lwongo i yoo macek ni UNISE. Laca i kare ma Kyambogo oribbe ki gang kwan madit pi pwonyo jo matye ki goro mapatpat (Uganda National Institute of Special Education), Uganda Polytechnic Kyambogo ki ITEK kama otugi doko Kyambogo University matye wa i kare man ni kun dok ki cima bene me bedo lapwony madit. Dong ticca weng i Kyambogo, an atiyi pi mwaka 25.

Glades (Ann): Ber twatwal dok meno gin me akwera maber ba.

Too-lit (Dr. Njuki): Mapat ki bedo lapwony, abedo ka kwedo kwed makato ne i pwonye. An aye abedo dano mukwongo ma neno lok kom lok ki leb i Uganda kulu.

Glades (Ann): Ber.

Too-lit (Dr. Njuki): An bene atiyi macalo lawang i lok kom lok ki leb pi mwaka apar wiye angwen nio ma ki yabo ka pwonye me pwonyo jo ma neno kit me lok i Makerere. Man omiyo tin dong wakwero pien watye ki jo ma ngiyo kit me lok loyo ma onongo wajenge i kom lumi kony aye ki bot dul mapatpat. Meno en aye kama an aa ki iye dok bene i kare nu ducu, abedo ka konyo mada i kit me pwonyi ot kwan. Dok bene omiyo aniang ni macalo lapwony, pire tek bota me cako ka kwan mo kama abibedo ki kero me konyo lutino mapol ki bene jo mamito kwano kit me pwonyi ki konyo kwan pa jo ma tye ki goro mapatpat romo nongo diro ki ngec ducu iye.

Glades (Ann): Ber matek man dong bene i miya dok tic me wot i gang kwan man ba nia i kit ma lok man ogudu cwinya kwede. Lok ada dok cuku cwinya mada. Dong ma pud peya waloko mapol, amito penyi lapeny mo ma pire tek. Kong mukwongo, ma onongo pud i tidi, in miti ni nongo tye me bedo dano ma nining ka i dongo?

Too-lit (Dr. Njuki): An onongo amito bedo daktar.

Glades (Ann): Kit ma i tye ka ruku kwede ki labor um i cawa ni, weko dong bene i nen calo daktar kikome ba.

Too-lit (Dr. Njuki): I ada gire an onongo amito bedo daktar ma neno lok kom yat matut. Dok bene onongo amito abedo ngat ma yango dano ento an ki nywala i gang ma pe onongo pe tye ki lim twatwal. Lunywala weng gubedo lupur ma nongo cente me culu kwan onongo obedo gin matek atika-tika dok man omiyo an abedo ka keng kwan mada pi peko me lim. Ento pi miti ki mar matek ma an onongo atye kwede pi kwan me bedo daktar omiyo adiyi cwinya kama i nongo cawa mukene ki ryema woko ki i gang kwan ni adok gang ento an pe ao gang kun akane woko cok ki gang kwan ka adok cen awaco ni baba na owaco ni i bibino. Pi man apwoyo Lubanga ni lunywala onongo obedo jo ma ngeyo dok woro Lubanga omiyo adongo i gang lega i kin luwer i kare me kwana nio ma atyeko kwan. Man bene obedo gin ma amaro mada.

Glades (Ann): An atye ka pwonyo jami manyen ma mako lok komi tin ba dok pire tek mada. Dong lapeny me aryo ma pire tek bene, in i maro kit dek angoo?

Too-lit (Dr. Njuki): Dek ma amaro? An amaro pwul binyewa ma ki tedo ki rec ki kwon matooke kacel ki okono

Glades (Ann): Winyo mit dok meno cwan ma nongo opong maber ba. Ber, apwoyo ngeyo meno dok ageno ni okonyo jo ma mito ngeyo in mapat ki ticci keken. Dong malube ki ngo ma in i timo, i loko manok ma mako meno ku? Ento kong wanen matut lok ma mako kwan pa jo matye ki goro mapatpat, makato ne goro ma weko kwan ki coc yelo dano. Ngo ma i romo waco bot wa ma mako goro man?

Too-lit (Dr. Njuki): Atamo ni an anongo miti madit kakany i nge kare ma atyeko kwan macalo dano ma neno kit me lok/leb pa lutino ki lok/leb pa jo matye ki goro mapatpat ki University of Newcastle matye olaya (UK). An aneno gangwa dok anongo ni ki nywalo wa ki yot kom ento awinyo malit ni an kena aye atyeko kwan me rwom ma piny (primary 7) dok pe aniang pingo. Man bene omiyo ka dano loko i kom goro mogo ma yelo dano i kwan, wiya poo i kom lugang wa dok acako waco ni kono onongo angeyo con kono akonyo lutino wa ojone ento dong tye lacen twatwal pien dong gudoko dongo woko. I kare ma anywalo lutina, acel i kin gi ma nyinge Camuel dong romo mwaka 28 kombedi, en obedo ka yele mada ki kwan ki coc. Mine obedo lapwony, dako na ma dong kwo ne orweny woko. Wabedo ka yele matek me konyo Camuel. Ento wiya opoo cut i kom gin mo ma akwano ma mako lok kom goro ma weko dano pe bedo ki kero me kwan ki coc maber ci atugi tamo i kom ngo ma kelo en goro ni bene kama anongo ni mogo ki nywalo ki dano anywala. Atamo ni man aye kin yoo acel ma goro nonge iye makato ducu dok omiyo atugi niang cut ngo ma omera tye ka yele kwede ki bene ngo ma woda tye yele kwede ma romo bedo en goro acelli. Man omiyo abedo ki miti matek me timo gin mo kakany kun i yoo acellu nongo atye ka konyo woda bene ki jo mukene.

Glades (Ann): Kakare dok aneno meno tye ka laro dano alip mapol mada makato ne kama watye iye tin. Dong kit ma i waco ni goro ni obedo gin ma ginywalo ki dano anywala, i tamo ni dano weng ma i dog gang moni romo bedo ki goro meno?

Too-lit (Dr. Njuki): Pe kumeno.

Glades (Ann): Ci dong bedo nining? Gwok i ngeyo ba?

Too-lit (Dr. Njuki): Atamo ni, man time kit macalo nyodo romo bedo kwede ki remo, kit macalo remo pa jo mukene romo bedo kwede, mogo romo nongo goro man. An pira kena aromo waco ni wan weng watye ki goro ni ento rwome aye patpat, mukene tye marac ento mukene pe rac. Man omiyo omera romo bedo kwede ma pe rwome rac matek calo woda ma dong otyeko kwane woko i University kama en okwano kwan ma mako tic cing. Ento ngo ma an angeyo en aye, goro ni bino ki mic mapatpat kit ma wangeyo dok goro man romo bedo gin marac mada malube ki kit ma dano mapatpat loko kwede.

Glades (Ann): Kakare.

Too-lit (Dr. Njuki): Gin mukene mede ma pire tek en aye, jo ma tye ki goro gin aye obedo lutam matego, jo ma pe lworu temo jami kono rac onyo ber, jo ma maro tic cing, jo ma tye ki diro me cuna. Woda madit kombedi tye ladiro me tic ki nyonyo me tic mapatpat (Computer), dano ma oyele mada ki kit me kwane i Kyambogo dok bene atye ki lupwonye adek madong gitye ka pwony maber atika-tika. Ageno ni i neno Joyce bene.

Glades (Ann): Angeyo Joyce, arwate kwede.

Too-lit (Dr. Njuki): En eno, meno aye ngo ma atamo ni aromo waco.

Glades (Ann): Manyuti gin ma pire tek aye myero jo matye ki goro man onge mede kit ma goro ni bedo kwede pieneni ka wawaco ni gini ki nywalo ki dano anywala, weko watamo ni lutino ducu i dog gang moni romo bedo ki goro meno?

Too-lit (Dr. Njuki): Romo bedo tye gire ento dok pe rac kun romo nyute lacer i kom lutino ni kikome onyo likwayo malube ki kit ma nyute kwede ki kare ne.

Glades (Ann): Apwoyo ngeyo meno dong kong i waca matut i kom gang kwani man?

Too-lit: Gang kwana ni aa ki i gang kwan ma dong kombedi walwongo ni Center for Lifelong Learning ma bene aa ki i yub ma onongo atemo i kare ma pud atye dano madit ma neno lok kom kit me lok i lobo man. Abedo ki ur twatwal i kom wel litino dok apenye kekena ni, 'aromo mede ki timo man ki dul litini man ducu ki acel acel nining' meno onongo pe twere ci cut cut atugi tamo yoo maber ma romo kelo gin ducu kacel kun akonyo gi. Man en aye kit ma ayabo kwede gang kwan man ma onongo kong ki lwongo ni Mukono Integrative Day and Boarding P/S i Mukono District kama bene atiyo iye pi mwaka apar kulu. Man omiyo abedo ki gom ni keto lupwonye ka konyo i gang kwan kany waromo konyo lutino mapol kit ma dong tye ka time ni dok atye ki lupwonye 25 dong in gang kwan kany kombedi. Dong waneno lutino mapol i kare ni, waneno lutino 80 i nino acel ma pe twero time ka ngat acel keken aye tye ka timo meno macalo lami kony i kit me lok.

Glades (Ann): Manyuti meno nyutu atyer ni meno pe time ka ngat acel keken do.

Too-lit (Dr. Njuki): Pe twere dok man obedo gin ma an amaro timo ne dok eni en aye yoo acel ma Miri (gamante) romo kwanyo ne me tic i gangi kwan pi pwony maber kit macalo lalo lok kom kwan i district, Paul ma olimo gang kwan kany owaco kwede ni, 'atamo eni pe gang kwan keken'. Atamo ni i anyim wabiyubu kabedo man me bedo ka timo kwed i lok kom kwan kama luwponye romo pwonye bene iye dok i kin yub wa me mwaka apar en aye me bedo ki kero neno lutino ma pud cako kwan acaka i kwan pa lutino, primary, senior ki kwan mapatpat.

Glades (Ann): I acaki paka wa i agiki?

Too-lit (Dr. Njuki): Kakare pien atamo ni wan watye ki peko madit pi neno mapatpat ma dano tye kwede i kom lutino kwan matye ki goro mapatpat macalo kit ma lupwonye mapol maro wot kacel ki lutino ma niang oyot. I gang kwan kany pe time kumeno dok atamo ni i romo neno ne bene ki i lubara wa ma waco ni 'adwogi maber i kit ducu, ki lutino ducu pigi tek'. Kit macalo awaco kwede, pe waromo dongo lobo man nikwanyo ka dano weng otimo gin mo. Pi man atamo ni wabedo ki gum me rwate ki dul ma ngiyo dok goyo yub i kom jami me akwana ki apwonya i lobo man macalo (National Curriculum Development Center), watiyo ki Kyambogo University ma gin tye dul acel ma pigi tek kany ki bene dul ma loyo lok kom peny macalo National Examinations Boards man ducu me neno ni wangiyo kit yoo ma watye ki pwonyo ki lutino man dok ka waromo aa woko bene ki i kit pwony macon ma oguru pwony woko dul calo lok kom kabedo ma orumu wa (SST), cura (Maths) ki mukene gu ducu ento me neno gi i yoo mapat kit macalo dong aloka-loka tye madit dok jo ma ogoyo yub me kwan ma i kare man tye katic onongo gipeke i gang kwan ni.

Glades (Ann): Meno ber adada.

Too-lit (Dr. Njuki): I ngeyo ka watamo i kare macon, dano onongo giyubu jami mapol labongo cito i gang kwan. Gang kwan man bene yeke me neno ni lutino gubedo ki kero me yubu jami mapol labongo kok i kom goro mo keken ma balo kwan pa latin. An kwana mukwongo obedo i kom goro ma mako wic onyo ryeko me adam.

Glades (Ann): Kakare kadi bed ni dong pe walwongo kumeno.

Too-lit (Dr. Njuki): Pe walwongo gire kumeno dong pien pe opore me lwongo ne i kare man. Meno aye kit ma obedo kwede i acaki ento kit ma piny loke kwede dong omiyo lwongo obedo ka loke nia ki i goro ma mako kit me dongo pa dano, goro ma mako kit me tam pa dano omede kwede paka oo wa goro ma mako kwan. An kono atamo ni man obedo aloka loka madongo mada ento anywena nywena matye i kom goro ma mako kwan en aye omiyo wabedo ka neno jami mapol bene ma mako lutino mogo ma peke gwok ki goro, lutino ma wigi tye maber dok man weng lutino ma ka i niang gi ci atamo ni i neno anyira mogo ma kwano kwan maber. Romo bedo ni goro gitye kadongo i rwom me yelo tam wigi ento gin nongo pud tye ki kero me timo jami mabeco ma romo gwoko kwo gi. Pieno obedo tic wa macalo jo ma neno lok me pwonye me neno lutino man calo jo ma twero bene pyem, timo ngo ma gin timo, pien menonongo en aye ngo ma gin romo timo, labole jo ma gwoko lengo i kabedo mo pe dok mite ni myero okwan gin mo matek wek otim menonongo an atamo ni tic pe gipoko i kabedo wa kany. Waromo ngeyo ni lutino man gin tye ki goro, dok onongo waromo jalo tic mogo botgi labole ka i tye ka yubu lengo, ka i tye ka lwoko bongo onyo jwero lum i dye kal gang, magi waromo weko bot lutino matye ki goro ni kun nongo wakeme ki lutino matye ki goro mukene ni bene wek gucit gutim jami mukene. Ento kany i romo nongo ni ngat moni otyeko kwane macalo dano matye ki diro me tic ki nyonyo mapatpat onyo labole i tic ki mac akuba ento nongo tye ka tiyo tic me Boda Boda. Dong gin ma pire tek en aye, atamo ni myero walok tam-wa omiyo gang kwan man tye me nyutu

labol macalo meno kit macalo anyuti kwede i wot-wa i gang kwan kany kama i neno lutino matye ka tic ki nyonyo mapatpat dok anyira ki awobe maro matek.

Glades (Ann): Ada, aneno anyira ma gitye ka timo jami me aura mada.

Too-lit (Dr. Njuki): Kany wan pe waneno lutino malube ki kama gua iye dok pe wapoko ni man nyako onyo awobi, wan waneno gin ducu calo dano adana. Kany pire pe tek kono awobe aye tedo dek ki timo jami mukene mapol, awobe tuku odilo wa anyira bene dok wan wamiyo jami ducu marom aroma bot lutino ducu.

Glades (Ann): Meno ber mada. Dong atye ki lapeny mo kuman piri. Amito aniang kong, ka waketo labole i kom goro ma miyo lutino pe twero kwan ki coc maber, tyen loke ni lutino macalo man romo kwan i gang kwan macalo man keken?

Too-lit (Dr. Njuki): Pe kumeno, apoka poka matye i kin gang kwan ki gangi kwan mukene ni aye, gang kwan macalo man tye ki ludiro ma ngeyo kit goro ango ma latin kwan moni tye kwede ki ngo ma gin mito kikome omiyo ka i nen waromo oo i rwom ma lupownye ducu tye ki ngec i kom goro mapatpat ma yelo lutino kwan ki ngo ma gi mito kikome ci kony pa gang kwan macalo man bene bibedo peke. Labole dong romo bedo ni, gang kwan man dong cut doko kama bino ka nongo mede ngec keken i kom goro mapatpat. An pira kena bene apeke ki miti me bedo ki gang kwan man pi labinaka ento dong pud tye en dok bene en keken aye tye ka miyo kony macalo man. Dong wamito lupwonye weng, wamito lupwonye omed ngec gi i lobo Uganda, lupwonye ma gipwonyo lutino ma pud cako kwan acaka, ki lupwonye mukene ducu i rwom me kwan mapatpat kadi wa ludiro i rwom mamalo myero bene gubed ki ngec ducu dok myero gunge bene ni lutino kwan ducu pe rom. Dok ka watimo man, ci tim me kwalo peny dong bibedo peke. Atimo kwed kama aniang ni lutino kwan kwalo peny pien gin peke ki tek cwiny. Dong ka i ngeyo lagam, pingo dok i kwalo? Pien wa ka kwalo peny bene omyero ibed ki ryeko wek pe ki maki pien ka ki maki ci pe bedo ber.

Glades (Ann): Meno ada gire, omyero i bed ki diro.

Too-lit (Dr. Njuki): Dong atamo ni, wan pe wamito gang kwan macalo man ento man romo bedo yoo acel ma romo kelo wa i lok ma mako kwan maber pi kit dano ducu. Ki tung bota, aneno kwan ma guru dano weng labong apoka poka macalo gin ma myero mada ento kekeni yoo ne aye pat dok i mito jami ki gedo macalo magi wek neno macalo meno ocube kama dano weng romo kwanyo gin mo ma opore pi gangi kwan weng. Ageno ni i kine mwaka 1990, yub obedo tye me neno ni but kabedo ducu ma i Uganda obedo ki gang kwan macalo man i kumalo, kupiny, kunyango ki kupoto ceng dok kabedo man omyero obed ki jami ducu ma mite me konyo kwan pa lutino matye ki goro mapatpat. Kabedo meno bene omyero obed ki jami pwonye mabeco kama lupwonye romo limo me nongo pwonye mapatpat, kama i neno ngo matime iye calo ot yat.

Glades (Ann): Meno kakare dok pire tek me ngeyo ne. Apwoyo tito pire kit meno. Dong amito ngeyo bene ka waloko i kom goro man labole ngo ma in i tamo ni dong tye lok kigeng onyo lok ma pe tye kakare ma dano waco i kom goro man?

Too-lit (Dr. Njuki): Lok madit ma pe tye kakare ma dano loko en aye ni lutino matye ki goro ni rwom me ryeko gi me adam tye lapiny twatwal, meno aye lok madit ma pe tye kakare kun i nongo ni goro ni miyo wic me tam mapat mada bot ngat matye kwede. An amaro poro man ki mutoka matye ki jami ne ma dore ka dano dwoyo ki mutoka ma dano aye timo jami ne weng ka ki tye ka dwoyo ne man miyo awaco ni ka i niang lutino macalo man, pwoyong i yoo ma opore kit mamite kwede. Mutoka aryo nu tiyo mapatpat ento gin weng mutoka dok man miyo ka waneno pol dano ma dongo ma gitye ki lim mapol i wilobo bene i nongo obedo jo matye ki goro macalo man. Jami ducu madongo i wilobo ni i nongo ni jo ma ogoyo tam pigi obedo jo matye ki goro macalo man, pol lucung wibyer bene en jo matye ki kit goro ni. Pingo tye kumeno, jo matye ki goro ni obedo jo ma maro temo jami wek gitim gin mo manyen ka i poro ki jo matye ki maber ma gin maro yeng oyot ki ngo manok ma dong gutimo. Jo ma peke ki goro ni bene gin luwiny mada ma i waco gin mo ci gitimo kit meno cut labole ka i waco ni bed piny, gibedo, pe i wor, gin pe wor bene ki mukene mapol ata ento ngat matye ki goro ni obikalo meno woko omiyo an iya yom mada dok an bene atye ki goro ni.

Glades (Ann): Oo, onongo pe angeyo meno.

Too-lit (Dr. Njuki): Tye kumeno dok iya yom mada i kome. Aa ki i gang matye ki goro malube ki anywali, meno kulu pe ogenga me nyutu kero na.

Glades (Ann): Meno labol ma pire tek mada dok ber me ngeyo ni goro ni pe gengo dano timo gin mo keken.

Too-lit (Dr. Njuki): An pe abiparo kadi ki bilwonga ni won jo matye ki goro ma weko dano pe bedo ki kero me kwan ki coc maber. Iya yom ayoma kadi me bedo wa latela macalo meno.

Glades (Ann): Meno ber dok in i tye ka timo tic me aura mada pi dano ducu. Man dong nyutu ni lok ducu ma pe kakare ni jo matye ki goro man gitye ki rwom me ryeko ma lapiny mito dong wa wek woko ku?

Too-lit (Dr. Njuki): Kumeno kikome. Joni giryek ka i nen in i niang gin ento lok madit kany en aye me weko lok mogo ma nyweno widano pien meno romo bedo lok ada makato ne bot lutino matye ki goro mukene kun nongo ki nyutu labol ma rom-roma macalo kong i ket labole i kom latin ma orii ka dongo romo bedo ki peko i kit me kwano kwan ki coc pien nongo meno obedo gin matek. Dong ka i nen goro mo keken kube ki kit me lok, peko gi romo bedo rom ento gin ma poko goro ma weko dano pe bedo ki kero me kwan ki coc maber en aye malube ki ngo matye i dog gang moni malube ki nyodo. Dong lapeny ma an amiyo bot lunnywal en aye, tye latin mo i gangi ma gwok orii ka pwoyong lok? Pien meno aye acaki ne. Dong malube ki meno bene, lutino ma tye ki goro me ding it gin rii ka pwoyong kit me lok ento meno goro mapat dok latin pud rii ka pwoyong lok ci meno nyutu ni goro ni tye. Man bene en aye ma omiyo lutino mukene coyo olung-tuke pien gitye ki peko me poko i kin acam ki acuc. Kit meno, pe gi ngeyo kono omiero ecit kany onyo kwica ki piny onyo malo dok man miyo nguta ki namba calo 6 lokke dwogo 9 kun nongo gin coyo coc olung tuke bene.

Glades (Ann): Manyuti meno aye weko nguta calo b doko d ki mukene bene kumeno.

Too-lit (Dr. Njuki): Lok madit kany mede en aye me nyutu yoo ma opore kit macalo i neno kwede lutino matino ka ruku war pol kare i neno gi ruku war kilong, man aye lanyut mukwongo iwi-tino.

Glades (Ann): Apwoyo ngeyo meno. Dong wangeyo bene ni lutino mapol nongo tek mada i acaki me pwonyo gin mo keken. Pi meno, in i romo niang nining ni latini tye ka nongo tek me pwonyo gin mo keken? I romo dong moko nining ni latini romo bedo ki goro ma weko en pe romo kwan ki coc maber kede nongo mede kit me dongo?

Too-lit (Dr. Njuki): Atamo ni peko romo bedo i kit ma dano dongo kwede dok malube ki kit ma dano pwonyo ki lok, lutino pole bedo ki kero me loko kwayi lok ma romo apar kulu i kine me oo i mwaka acel.

Glades (Ann): Meno lok ada kadi bed ni pe angeyo kom wel kwayi lok ne kikome.

Too-lit (Dr. Njuki): Tye i kine kwayi lok ma romo 10 me oo i 15 kenyo ki dong me aryo ne, i kine me mwaka aryo nongo dong myero gubed ki kero me waco kwayi lok ma romo aryo ka acel. I kine me mwaka me adek, dong romo bedo kwayi lok adek nio wa i mwaka me angwen kama dong wabyeko ni latin myero ocak kwan. Kany dong nongo latin loko lok mogo oyot-oyot ento ka i nen agala gala tye ma gengo latin timo jami mogo i kit me kwo kare ducu ci man nyutu ni goro man romo bedo tye.

Glades (Ann): Dong meno winye calo ni ka i nen ngati mo tye ki goro man romo nyutu lanyut ma lutino nyutu i tino i kit me dongo ento nongo dok nyute pi kare malac.

Too-lit (Dr. Njuki): Meno kakare dok bedo pi kare malac.

Glades (Ann): Ber, apwoyo ngeyo meno, kadi bed ni pud agomo twatwal malube ki lok wa i kom goro man bene malube ki goro mogo mapatpat. Dong, ngo ma obedo me aura mada ma i pwonyo ki kakany makato pi mwaka mapol ma i tiyo tic ducu kany?. Gin mo manyen ma onongo pe i ngeyo kulu.

Too-lit (Dr. Njuki): Kakare, jami mapol obedo me ur mada dok atamo ni apwoyo jami mapol i kine me mwaka ma atiyoy kany. Malube ki diro na ki ngec kakany, abedo ki kero me ngeyo dano matye ki goro man ki goyo yub pi konyo lupwonye ki tic gi kakany dok aniang ni goro man yelo kit me ryeko mapatpat. Pe i romo bedo ki goro ni ka ryeko me wii tye lapiny, ladyere ki dok ka i nen tye lamal twatwal.

Glades (Ann): Manyuti kadi bed ni i tye ki mic mapatpat pud i romo bedo ki goro ni.

Too-lit (Dr. Njuki): Goro ni pe poko. Dong gin me aura me aryo en aye kit ma dano obedo ka niang kwede pi mwaka mapol ni, wek i bed ki goro ni nongo myero i bed ki mic mo onyo ryek mada ento meno pe tye lok ada.

Glades (Ann): Lok meno obedo niang marac mada.

Too-lit (Dr. Njuki): Kakare jami ne pe bedo kumeno dok ka i nen jami mamite ducu ki keto i tic me lweny i kom lanyut iwi tino ci lanyut me goro ni romo rweny woko. Pud gire i romo bedo ki goro ni ento nongo lanyute ducu orweny woko. Pien magi ducu obed gin me yub, dano ducu matye ki goro ni dok pe bedo ki kero me kwan maber bedo me ur mada labole aneno i kom luwota kama pe gumito ki niang i goro man nio ma dong gityeko kwan gi.

Glades (Ann): Wulu.

Too-lit (Dr. Njuki): Pe omiyo ki ye nio ma amoko bote.

Glades (Ann): Kakare dok magi aye jami me aura ma apwonyo gi ma mako goro ni.

Too-lit (Dr. Njuki): Kom lok, joni obedo jo maryek mada ma ka gupwonyo gin mo keken gin gak kwede. Meno obedo gin me aura me niang dok gin gene kit ma atamo kwede dok amaro tic kwedgi pien gitye ki kero maber atika omiyo tic kwedgi yot ma kato ne ka i niang gin ki bene goro ni ba pe maro bedo kene kun en lube ki goro mukene calo ADD ma dong waloko i kome i lwodwa ma okato.

Glades (Ann): Kom lok dok bene atamo ni jo ma obedo ka winyo dul lwod me pwonye wa ma okato gupwonye i lok kom goro ma ki lwongo ni ADD kacel ki ADHD.

Too-lit (Dr. Njuki): Meno kakare dok bene pe tye yoo acel keken me lweny i kom goro ni, mito yoo mapol ma ki guru doggi kacel wek ki pwony gi dok bene pe ni lupwonye keken aye twero. Pieno omiyero watiyo kacel ki diro mapol wek wacob miti gi dok magi mito neno ma bedo pi kare malac. Kit ma gangi kwan i Uganda tiyo kwede pe romo konyo twatwal kany pien gin neno lupwonye calo jo ma gin aye twero. Man mito ribo cing kacel ki dul mapatapat ki gangi kwan, lutic ma gityo ki dul mogo ma neno pi kit me kwo pa dano myero okony lok ki lunywal pien lupwonye ool mada ki lutino kwan dok pe giromo limo lunywal bene wek jami ducu ocobe kakare. Lunywal pigi tek atika-tika dok meno miyo opore mada me bedo ki pwonye pa lunyodo kare ducu wek jami ducu otine maber. Dong bene wapeke ki peko i lok me coko cente me culu kwan pien waloko atyer ki lunywal omiyo wacoko cente wa i 95%.

Glades (Ann): Meno ber mada dok tye wel ma lamal matek ka i poro ki gangi kwan mukene i Uganda.

Too-lit (Dr. Njuki): Dong wiye abic moni madong ni meno niange. Pieno atamo ni lok ki lunywal pire tek dok konyo me kubu wat ki dul mapatpat ma woko bene makato ne jo ma miyo konyo bot lutino malube ki goro gi. Dong kombedi lutino kwana ma romo 40% gi neno daktar mapatpat malube ki goro gi.

Glades (Ann): Kakare dok angeyo ni meno pe yot me kwo ki kwan kit ma wabedo ka lok kwede i kom goro ni mapat bene ki goro mukene.

Too-lit (Dr. Njuki): Kit meno kikome.

Glades (Ann): Manyuti goro ni yelo latin i yoo mukene bene mapat ki kwan?

Too-lit (Dr. Njuki): I waco kakare, i kare mukene waketo neno wa i kit me kwan i ot kwan keken ento tye bene ayela mukene ma yelo latin ma myero ki nen gi bene ma rom-aroma.

Glades (Ann): Kakare, meno bene dong niange maber. Dong i tamo ni ngo ma waromo waco ne ki lunyodo? Ngo maber ma lunywal romo timo ne bot latin ka guniang ni tye ki goro ni?

Too-lit (Dr. Njuki): Me acel en aye ye i kom goro ma latin tye kwede. Lunywal wa ki ngat mo keken mito gin maber ma en aye bene omiyo atamo ni weko lunywal maro poro lutino gi ki lutino mukene kadi gitye ki goro ni ma man bene obedo gin ma pe opore. Pien i gang kit macalo wanywako kwede, romo bedo ni lutino weng tye ki goro ni dok nongo rac bene adada pien lunywal obedo kwede dok pe i romo bedo ki goro ni ka lunywal pe gubedo kwede. Kit meno, man miyo lunywal mogo kok i kom lutino gi me ka pwoyo kit ma gitye kwede ki gin ma gitimo maber.

Glades (Ann): Meno ada gire dok nongo pe gitimo pi miti gi.

Too-lit (Dr. Njuki): Kit meno kikome. Goro ni ngat mo ma omiyo peke en ma omiyo yeyo ki cwak maber ki bot lunywal pire tek. Myero lunywal guye i kom goro ma latin tye kwede ki gumi kony ducu mamite dok guwek latin meno obed ki kero me kwan rom-aroma. Poto cura ki gin akwana mukene ni pe dong myero obed tyen lok me kwanyo latin woko ki i gang kwan. Pire tek me neno jami mapol kany. An nino ducu ka anongo lanywal pud pe ye omiyo abedo ka yenyo ngec i wiyamo kun atiyo ki nyonyo pa munu (computer) kama dong i nongo ni ki kero ma dong watye kwede me nongo lok angeya ni, lunywal romo nongo lagam mogo ki bene tic ki dul mogo matye ka cake calo en Backup Uganda, SQUAMI, Special Needs Quality Assurance and Monitoring Initiative. Ageno ni magi nen nyen pud gire ento obikelo aloka-loka madit maber mada. Dong ageno ni magi pi konyo lunywal me nongo lagam ducu i kabedo acel kama i nongo dano matye ki diro i lok kom diro me lok, lapwony ma pwonyo lutino ma tye ki goro mapatpat, lupwonye mapatpat ki mukene ducu kun man obiyabo wang lupwonye mukene bene.

Glades (Ann): Meno dong miyo yoo mayot me ngeyo ngo me atima ku? In i waco ningo? I romo miyo tam ango bot lunywal ma tye ka winyo dul lwod me pwonye man? Ma gin romo bedo ki ur iye mada ni man pe winye calo gin manyen. Atamo ni latina onyo lutina romo bedo ni gitye ka yele ki goro ni ba. Dong atim ngo? I tamo ningo?

Too-lit (Dr. Njuki): Atamo ni Miri (gamante) tye ka yele me dwoko yub me ngiyo jami me pwonye woko. Pi meno, ka gutimo meno cut ci atamo ni en i cik manyen meno man bidwogo cik ma pire tek pi district acel acel me neno ni gitye ki kabedo kama ki romo ngiyo lutino pi kit goro ma gitye kwede iye.

Glades (Ann): Meno dong weko pe ni myero kong gubin Gulu, Kabale ki kabedo mukene ni.

Too-lit (Dr. Njuki): Ka dong kabedo macalo meno tye i kabedo ducu ma i Uganda ci kit me pwony obiloke. Man obiweko i kare ma tyeko kwane nongo ki ngeyo goro pa latin kwan acel acel. Man bene obibedo me miyo gen bot lunywal pien gin aye ki kwongo neno kit goro mo keken i kom latin mapat ki gang kwan. Dong ka i nen i loko ki lunywal, gin gubiwaci ni aneno latini i kare ma pud cako kwan acaka. Man omiyo atamo ni wat i kin lupwonye ki lunywal tye gin ma pire tek adada i kit me pwonye makato ne i gang kwan macalo man. Dong pi meno acuku cwiny lunywal me yenyo ngec ma mako ko goro man ki i kabedo ma gin tye iye pien angeyo ni romo bedo gin ma wele tek ka i medo ki wot i kin piny mapatpat ma omiyo ka waromo bedo ki jo ma miyo kony ma mako lok kom kwan ma ribbo dano weng labongo apoka poka kadi wa i gang lega ci meno bibedo lek maber mada. Pi man atamo ni myero wati me cobo neno meno, Miri (gamente) oyabo kabedo mogo i district, wan bene twero bedo ni wagedo kabedo ma weko kube bedo yot i district moni man konyo i kit me wot calo aa ki kany me cito Kampala romo bedo 3,000ugshs, 7,000ugshs onyo 10,000ugshs. An angeyo ni tye dul pa mege i gangi lega dok man gin mege myero gulok iye wek gunong luwang lutino matye ki goro. Waket ni i tye ka yele me ngiyo lanyut, jami akwana mogo matino myero obed tye i leb tekwaro ki radio, radio me kabedo moni kit macalo nongo tye ka tic kwede. Ka dong lanywal ongeyo ni latine romo bedo ki goro ni, wamiyo ngec meno bot ludiro i lok kom goro man matye i kabedo meno ci meno miyo yoo mayot me miyo kony ducu mamite.

Glades (Ann): Meno miyo gi nongo jo ma opore me miyo kony

Too-lit (Dr. Njuki): Kumeno kikome

Glades (Ann): Dong meno bibedo me kony mada dok ageno ni dano ducu matye ka winyo wa ma bene tamo ni nen calo awinyo loki kong con onyo ni aneno gin macalo man i kom latina onyo ni i koma an kikoma bene.

Too-lit (Dr. Njuki): Kit meno kikome.

Glades (Ann): Kit macalo wawinyo, myero walub tam meno. Dong me giko, atye ki miti madit, pien arwate ki lutino kwani mukene macalo Peace dok aloko kwede kama bene apwonye i kom lok mapol. Ento abedo ka gomo ka i romo nywako labol mogo mabeco i kom lutino mukene labongo lwongo nyingi gire.

Too-lit (Dr. Njuki): Pe kumeno ba.

Glades (Ann): Kakare gire, mung pa dano pire tek.

Too-lit (Dr. Njuki): Atye ki latin awobi ma lapwony mo aye ocwalo, ki mapol bene i kine mwaka 15 kenyo. Latin awobi ni onongo yele mada ki kwano nguta dok onongo aa ki gang kwan acel mo ma pe pa Miri (gamente). En lapwonye aye ma omoko pire kama en oloko ki ladit ma loyo gang kwan meno ci laditi onywako bene ki lawote i kacoke. Man en aye kit ma wakube kwede dok onongo gilwonga ni Mr Njuki Paul pien onongo peya anongo nying me Doktor malube ki kwana i kare meno dok onongo bene pud atiyi i Kyambogo University. Gin gubino

bota ci aneno latin meno ci amoko bene ada ni en tye ki goro ni. Wacako neno ngo me atima, lunyiwal ne onongo gitye atera me timo gin mo keken ma gin gitwero me neno ni latin gi okwano pien i gang gi, lutino mukene ducu dong gukwano woko. Dong gubedo bene ka gomo mada pingo man tye peko ci gubino bota kama watugi keto latini i gang kwan ma konyo lutino calo en ma onongo pud tye Mukono Integrated Day and Boarding i Mukono. En okwano P.6 ki P.7 kama okato bene ki dul mukwongo onyo gin ma leb munu lwongo 'first grade'. Dong i kare ma en onongo tye kwedwa, en onongo obedo dano matye ki mic me ngwec dok i kare meno wiya poo wacito i Namboole kama en ocito obedo laloyo i pyer kalo tol.

Glades (Ann): Meno obedo gin maber mada.

Too-lit (Dr. Njuki): Waloyo i kare meno dok en obedo ki kero me wot i China.

Glades (Ann): Oo otimo meno kulu.

Too-lit (Dr. Njuki): En aye obedo dano mukwongo i gang gi me ito dege dok meno otugi bedo gin me aura mada kama dong bene kombedi ma waloko ni en tiyo ki dul mo madit mada. En bene tye lalo lok kom tuku i Uganda kulu bot dul meno dok en dong miyo tam bot lutuku matino me mako kwan, lok kom tuku ki bedo ki neno ma opore i kabedo gi. En otyeko kwane ki i Kyambogo University. Dong bene awinyo ni tye ki mito me bedo lacung pi lwak i ot moko cik me lobo man. Man alwongo ni gin maber ma otine pire ki gang gi dok bene atamo ni lugang gi nywako caden man maber i kom ngo ma otime. Ka i goyo cim i loko ki mine, en pol kare iye yom mada pi ngo ma otime.

Glades (Ann): Meno gin me aura mada. Pwoc boti pi tic maber.

Too-lit (Dr. Njuki): Gin gitye mapol mada. Lakenya acel bene kombedi dong otyeko kwane woko i kit me goyo yub pi gedo kama en dong goyo yub macalo meno i kabedo madongo.

Glades (Ann): Dong man bene waco ni myero pe wakeng jami mogo ma mako diro gi ku? I tye ki lutino matye ki goro ma yelo dano i kit me coc ki kwan keken kede mukene bene?

Too-lit (Dr. Njuki): Atamo ni gang kwan mo keken ma konyo lutino matye ki goro ni, myero ogo yub ma miyo kare ki lutino man me nyutu diro gi. Diro meno ki tiyo kwede me cuku cwiny gi i kom goro ma gitye kwede. Pi meno diro obedo gin ma pire tek, calo kany, i ceng adek weng, pe wabedo i ot kwan, meno obedo nino me nyutu diro, wabino ki gambut, pala cwec ki jami mukene kama watiyo kwede jami mapol. Meno nino tic mapatpat. Dong bene amiyo tam bot lupwonye me kwanyo nino acel me bedo nino me tic me bedo i ot kwan mede ka tiyo tic mayot calo lok ki gin coc i kor ot. Ka i nen i goyo yub calo ni, ceng aryo weng bedo nino tic, dano weng obimine me timo tic i nino meno dong man omyero waket calo gin ma pire tek. Dok dul macalo UNEB bene myero gungi kit ma gineno kwede pwonye ma mako lutino man, tic ma mako tic cing aye omyero obed gin ma pire tek kany kit macalo lutino macalo man romo poto jami mapol ma mako kwan ki karatac i ot kwan ni. Ento ka gityo ki cingi, i romo neno kit ma diro gi tye kwede manyuti myero ki lok kit me neno pwonye gi woko.

Glades (Ann): meno ada dok nyutu ni pe kwano buk keken aye pire tek i kwan.

Too-lit (Dr. Njuki): Kakare.

Glades (Ann): Ber, apwoyo matek. Atamo ni apwonyo jami mapol, ada jami mapol ma i waco gi onongo pe angeyo dok amaro meno. Atye ki gen ni dano ducu ma winyo lok man obipwonye bene. Apwoyo jolo wa i gang kwan kany. Iya yom mada pi jami mabeco ma wutye katimo ne kany. Pi man, wagiko kakany pi tin dok apwoyo matek.

Glades: Wapwoyo winyo dul lwod man me abiro me Lutino weng romo Pwonye. Tim ber i nywak tami kwed-wa onyo wakube wunu i wiyamo me facebook ki bene i romo cwalo lapeny mo keken ma i tye kwede i namba cim matye 0772630078. I mito ngeyo lok mapol ma mako kom dul me Backup Uganda ki ngo ma wan watimo kun i mede ki lubu wan bene? Lub wa i wiyamo i paco wa me internet i www.backupuganda.org onyo i facebook, instagram, Twitter kacel ki LinkedIn.